

Meeqqat atuarianni qanoq ililluni eqqumiitsuliornermik atuartitsineramik siuarsaanerup meeqqat atuariannik soqutiginarnerulersitsillunilu atuartut piginnaasaannik qaffassaasinnaanera kiisalu angusanik pitsaanerulersitsisinnaanera pillugu apeqquteqaat aallaavigalugu oqallisissiaq. Taamattaaq qanoq ililluni eqqumiitsuliornermik ingerlataqartut atuartitsinermi annertunerusumik atorneqarsinnaanerat ilanngullugu.

(Siunnersuuteqartoq, Peter Olsen, Inuit Ataqtigiit)

Peter Olsen, Inuit Ataqtigiinneersup, oqallisissiaanut pissanganartumut pingaaruteqarluinnartumullu Siumumiit qujassuteqarpugut.

Oqallisissiap qiterpiaa tassaasoraarput, meeqqat atuariat qanoq pitsaanagerusumik meeqqat pinngorartitsisinnaanerannik ikorfartuisinnaanersoq, tassuunami meeqqat eqqarsallaqqinnerat, nutaaliorsinnaanerat inerisarnerallu ilisimatussutsikkut takussutissaqarluarmat.

Taakkuninngalu atuartitsineq imaqaassappat pinngorartitsisartut, nutaaliortut aammalu namminersortut atuariup ammaannerunissaanik kinguneqartussaasariaqarpoq. Tassa inuit pikkorissut ilinniartitsisuunngikkaluit aamma atorluarsinnaanerunissaat anguneqartariaqassalluni.

Tamanna Siumuminngaanniit isummersorneq ilalerparput. Tassami ippassaaniinnannguaq ilinniartitaanermut ataatsimiititaliap IMAK ulloqqeqasioqatigivaa, tassanilu IMAK-p siunnerfigisai ersaripput, meeqqat atuarianni nukarliit pinngorartitsineramik, aalaneruneramik oqaatsitsinniinnarlu atuinissamik piumasaqarneq erseqqissaassutigivaat, tungavilersuutaallu ilisimatussutsikkut aamma tungavilersugaallutik.

Ilinniarfissuarmiikkallarama Los Angelesimi studierejseqataavunga, meeqqat atuarii privatit arlallit pulaarpagut. Taakkunani pinngorartitsineq pingaaruteqarluinnartoq ersarippoq, nipilersorneq, qalipaaneq, gitariliorneq, trommeqatigiinneq allarpassuillu atuarianni assigiinneqisuni qitiulluinnartut takussaapput. Ilinniartitsisorpassuaqarput saniatigullu pædagoginik ikiorteqarlutik. Ilaammi marluinnarnik ukiulinnik allaat atuartuteqalereersimasarput, allannermik sungiusagaalereertarlutik, pinnguarnertalinnik.

Saniatigut ph.d.-lik Miillaaraq Lennertip Atuarfitsialak misissuiffiginikuuaa, imartungaatsiartumik. Massakkullu suleqatinilu kommunini suleqateqarlutik atuariannik sinaakkuseeqataasarlutik ineriartortitsillutillu angalaartaleqqammerput. Aamma taakku ataatsimiititaliami naapinnikuuagut. Oqaatigivaallu Atuarfitsialaap inatsisaa immiini ajoquteqanngitsaq, atuariilli aamma tiimit



namminneerlutik siunertaqaqqissaarlutik nalimmassarsinnaagaat, fagillu akimorlugit atuartitsineq atorneqarnerusinnaaqisoq.

Immikkulli tikkuagaat tassaavoq, politikikkut atuariit annertussusa at isiginerusariaqarivut, atuartoqassuseq, illoqarfigisami periarfissat suuneri, ilinniartitsisut qassiuneri, taamaalilluni kommune meeqqat atuariinut tamanut assigiimmik piumasaqaateqarani atuariinut ataasiakkaanut immikkut periusissioartariaqaleqqasut. Taamaalilluni lokale valg ilimanaq aamma annertusarneqarsinnaalissagunaraluatoq.

Kisianni Siumumiit isumaqarpugut meeqqat atuariat piffissanngortoq eqqarsaatigeqqittariaqalersoq. IMAK-mit piumasaq ersarippoq, aamma taamaaliornikkut ilinniartitsisunik atorluaaneq piulersinnaalissammat, aammalu ullutsinni oqaatsivut inissilluarsinnaasanngisavut pimoorussamik meeqqat atuarianni ilikkarluarneqarsinnaalissammata, ullutsinnimi oqaatsit pingasut atorlugit ilinniartitsisoqarniarpaluttarmat.

Ilisimatusarfinni massakkut meeqqat atuariannut tunngasumik arfinilinnik ilisimatusartoqarpaluppoq, naammassingajalersunik. Taakku pissanganassaqaat qanoq oqariartuuteqarsinnaanersut.

Saniatigullu Siumumiit siunnersuuterput aamma pitsaasumik aqutissiuus sisinnaajumaassasoq qularinngilara.

Meeqqat, innuttaasullumi, kulturikkut nukittuut aammalu eqqarsallaqqissut, pinngorartitsisut sikkertilissagutsigit pingaaqaaq toqqammavilersorluakkanik, ataqatigiissaarisumik eqqarsarluarnikkullu sammineqarnissaa. Taanna pissaaq qanimut suliaqartut, sulisitsisut, kattuffiit, ilinniarfiit, ilinniusiorfiit aammalu ilisimatuut suleqatigiinnerisigut. Oqariartuutigineqalereersulli ersareqaat, taakku tusaaniarlugit politikikkut anguniagalersorsinnaavugut. Naalakkersuisullu pilersinniagaat Uddannelsesråd aamma pissanganaqaat, taakku Nunatsinni ilinniagaqassutsikkut isiginninnerat siammasissaqimmat, taamaattumillu siunnersuutigisalerumaagaat pissanganaqalutik.

Taamatut Siumumiit oqaaseqarluta oqallissaarisumut pingaaruteqartumut qujavugut.

Najaaraq Møller
Siumut